

慶曆四年春滕子
京謫守巴陵郡越

明年政通人和百
廢俱興乃重脩岳
陽樓增其舊制刻
唐賢今人詩賦於

其上屬予作文以
記之予觀夫巴陵
勝狀在洞庭一湖
銜遠山吞長江浩

浩湯湯橫無際涯
朝暉夕陰氣象萬
千此則岳陽樓之
大觀也前人之述

備矣然則北通巫
峽南極瀟湘遷客
騷人多會於此覽
物之情得無異乎

若夫靈雨霏霏連
月不開陰風怒號
濁浪排空日星隱
耀山岳潛形商旅

不行檣傾楫摧薄
暮冥冥虎嘯猿啼
登斯樓也則有去
國懷鄉憂讒畏譏

滿目蕭然感極而
悲者矣至若春和
景明波瀾不驚上
下天光一碧萬頃

沙鷗翔集錦鱗游
泳岸芷汀蘭鬱鬱
青青而或長煙一
空皓月千里浮光

耀金靜影沉璧漁
歌互答此樂何極
登斯樓也則有心
曠神怡寵辱皆忘

把酒臨風其喜洋洋者矣嗟夫予嘗求古仁人之心或異二者之為何哉

不以物喜不以己
悲居廟堂之高則
憂其民處江湖之
遠則憂其君是進

亦憂退亦憂然則
何時而樂耶其必
曰先天下之憂而
憂後天下之樂而

樂乎噫微斯人吾
誰與歸時六年九
月十五日